

RECENZIJA

U elektronskom obliku dostavljen nam je rukopis knjige „*PORODIČNO PRAVO U PRAKSI*“, autora prof. dr Duška Medića, sudije Ustavnog suda Republike Srpske i redovnog profesora Fakulteta pravnih nauka Univerziteta „Apeiron“ iz Banje Luke, i Hase Tajića, urednika časopisa „Domaća i strana sudska praksa“, u izdanju Privredne štampe d.o.o. Sarajevo.

Autori su našoj pravničkoj javnosti ponudili još jedno obimno i vrijedno djelo iz oblasti građanskog prava. Odluka autora da ga sačine je opravdana i višestruko korisna. Zakonodavstvo, sudska praksa i teorija ne mogu jedno bez drugog, pa je više nego neophodno da se ova knjiga publikuje kako bi bila dostupna široj pravničkoj populaciji, ali i svima onima čiji se domen interesovanja odnosi na porodično pravo. Autori su uložili ogroman trud i sakupili brojne sudske odluke iz oblasti porodičnog prava, zatim ih razvrstali po institutima. Sudske odluke su znalački birane iz mnoštva dostupnih izvora. U rukopis su uvrštene najznačajnije odluke Vrhovnog suda BiH i ostalih sudova u BiH, donesene prije raspada SFRJ, ali i odluke vrhovnih sudova (i ostalih sudova) entiteta, donesene poslije nastanka BiH kao samostalne države. Ovo djelo po svom domašaju i potpunosti prevazilazi državne okvire Bosne i Hercegovine, jer su autori u knjigu uvrstili i sudske prakse vrhovnih i ostalih sudova republika bivše SFRJ, kao i sudske prakse sudova samostalnih država koje su proistekle iz SFRJ.

U knjizi se ukazuje na međunarodne standarde iz ove oblasti definirane Europskom konvencijom o ljudskim pravima i temeljnim slobodama, koja, prema Ustavu BiH (članak II. 2. Ustava), ima supremaciju nad svim domaćim zakonima i direktnu primjenu u Bosni i Hercegovini.

Kako treba primjenjivati standarde iz Europske konvencije iz porodičnog prava, autori ovog djela ukazuju na to čitateljima ove knjige kroz odgovarajuće odluke Europskog suda za ljudska prava i Ustavnog suda BiH, date u posebnim prilogima na kraju knjige.

Dugogodišnje iskustvo autora garantuje da će čitaoci u ovom zborniku naći odgovore na mnoga sporna pitanja. Sjajna odlika ovog djela jeste navođenje potpunog izvora sudske odluke.

Knjiga će poslužiti stručnjacima i praktičarima ne samo u BiH već i u regionu, ali i onima koji se tek upoznaju sa ovom granom prava. Tu mislimo i na studente osnovnih i postdiplomskih studija. Značaj ove knjige proizlazi i iz stručnosti i dosadašnjeg rada autora. Brojne knjige, članci kao i stručnost autora doprinose da će i ova knjiga naići na veliku pažnju čitalaca. Iako predstavlja skup sudske prakse, knjiga daje i naučni doprinos imajući u vidu da će se koristiti ne samo kod primjene zakonskih odredaba već i kod definisanja i pravilnijeg shvatanja mnogobrojnih instituta u ovoj oblasti.

Zbog svega navedenog, imamo čast i zadovoljstvo da izdavaču predložimo da štampa rukopis autora prof. dr Duška Medića i Hase Tajića „*PORODIČNO PRAVO U PRAKSI*“.

Prof. dr Milorad Živanović,
redovni profesor Fakulteta pravnih nauka
Univerziteta „Apeiron“ Banja Luka

Hajrudin Hajdarević,
sudija Vrhovnog
suda Federacije BiH u penziji